



鼃之鳴至濁矣或者曰此鼓也蚓之鳴至微矣或者曰
此笛也僕之五七字至無節奏矣而或者曰此詩也天
下不虞之譽故多出於意外而人之嗜好品評往往有
如此者僕未冠時喜學爲古文詞又好言六書詰訓之
學其於詩未暇兼營也偶有所作旋即燬棄朋儕中不
乏能詩之士未嘗敢與之應酬倡和僕雖不才蓋深知
恥也丙寅以還境遇日困中心鬱紆無所控告感事述
懷輒以詩發之如病夫之呻吟如被榜者之呼譽此豈
有意媚人之耳目者然閒出以示人亦或以爲可喜里
有女奇醜撫鏡自照知其醜之弗可以飾也屏粉黛絕

華炫椎髻布衣謝媒而勿嫁此僕之詩品也客之好僕
詩者果何所見邪往者嘗以詩質之內兄許周生請其
政定久之弗應彊之則曰君詩無可毀亦無可譽不能
有所言也若周生真深知僕詩者嘉慶戊辰夏五月元
照自序

詩也者所以自道其性情也情之有悲愉緣干境之有
逆順境之逆者處之難境之始順而繼逆者處之爲尤
難矣悔葦居士好古力學自其弱冠時已有聞於當世
相知者咸以金閨玉堂相期待顧於世之榮利漠然置
之年未壯抱風木之痛甫免器而骨肉滋豐不能安其
故居舍而之吾邑卜居於城北柯家山之麓垂六年矣
人情弃苑集枯鮮不鬱邑侘傺而爲不平之鳴者居士
則曰有山水以悅吾性有載籍以資吾學有良友朋以
廣吾聞見我之所得者已不薄矣吾更何歎乎故所作
詩不皮附前賢而忘其身世不信筆酬應而沮其性靈
和雅清婉遠紹風人之旨開化戴刑部謂其品在永叔
介甫之間也今茲居士取己巳以後古今體詩如千首
彙錄一冊昇球讀之命爲之序球之弁淺何足以知居
士詩然念從居士游有年辱居士知愛不敢不有所言
居士尚有以教之幸未秋九月德清後學徐球序

辛未之秋悔菴居士屬球序其詩越一年而居士病病五年而竟不起孔文舉所謂憂能傷人不得永年者與今其身後之事交游所不能為謀者固無可如何至於平生篋箒弗使湮沒九原有知不能無望于友朋也邑侯順德何藜閣先生屬球校錄其自定詩彙六卷規付削刀更識數言於舊序後竊謂居士之學不盡於詩見居士之詩亦不盡此六卷其所芟存有深意焉後之覽斯集者亦足以見其學之有成而悲其遇之窮也丁丑九月球又書

柯家山館遺詩目錄

卷一

丙寅丁卯計八十首

卷二

戊辰計八十七首

卷三

己巳庚午計八十五首

卷四

辛未壬申計一百四十四首

卷五

西甲計一百廿六首

癸酉甲戌乙亥計一百廿九首

卷六

丙子丁丑計一百廿五首

卷二

丙子丁丑計八十首

卷一

丙子丁丑計八十首

卷一

丙子丁丑計八十首

柯家山館遺詩卷一

歸安嚴元照修能

金匱楊戶部芳爍自京師寄示所作香修曲賦

謝以下丙寅

雪花蔽空舞窗下朔風吼寒梅報臘盡窮愁互相守佳
人眇天末悵望空搔首詒我百琲珠延佇半年久不分
小除夕郵筒落吾手長篇香修曲清絕無點垢娟娟雪
中月濯濯春前柳風調比前輩定出梅村右擊節曼聲
歌歌罷更呼酒京華三千里魚鴈不時有握手空復情
此生知得否感此心悵悵因之呼負負君詩廿年前已

見棗梨壽子雲生竝世佳句傳萬口大名在文苑較勝
印懸肘茫茫閱人世如君洵寡耦升沈一朝事豈足定
妍醜襟懷應曠蕩放眼千載後何庸嘲菜把鬱鬱歎衰
朽寄君詩一篇離悰細分割藏拙附片言煩君爲覆瓿

送家上舍

章傑

之安徽

紅橋畫舸春江潯垂楊垂柳煙雨深驪駒歌殘客欲別
紛然淚下沾衣襟送君千里江南道只有萋萋原上草
對鏡朝來白髮生始信銷魂人易老與君小小結相知
荏冉流光又幾時屈指交游多不俗推君第一斷何疑
痛念先人暮年病瀕危豫託癡兒命孤露怱怱歲七更

蕭牆是處生機阱外侮紛芸雜內虹艱危反側仗莽蠹
西窗翦燭宵來雨話舊依稀似夢中饑來抵死催人去
爲我行行復猶與風雨飄搖又隔年更欲畱君那能住
君到蕪城正暮春故山回首總傷神秋風莫負明年約
碧浪湖邊好結鄰

題何三

元錫

蒙泉高寄畫卷

高樓對孤山春雨洗濃翠祇今葛林園是古招賢寺吾
友昔遠歸於焉此身寄湖山作清供琴書絕塵累便應
長閉門消搖謝人事何必求長生神仙已不翅移家眞
大錯入城近塵肆須眉染俗狀米鹽飽世味偶然落湖

舫閒鷗笑顛頰唯餘尺幅畫依稀見高致十年負此圖
撫卷應自媿晴窗重摩挲殷勤乞題識莊言吾未暇下
筆且游戲

章傑

約過里門不至以詩督之

沈沈春夜永一燈耿如豆懷人不成夢側耳聽殘漏中
宵披衣坐顧影驚老瘦淋浪一夜雨谿橋添曉溜片帆
出城南半日可相覲閉門如茹毒耳目苦眩瞶藉君劇
談力起廢勝鍼灸逾約有責言先以尺書授遲遲過寒
食相見定遭詢

重送 章傑

欲開未開花滿枝欲垂未垂楊柳絲當筵酌君一杯酒
問君行計何遲遲隄邊夜來水拍滿水蕩搖搖出水短
鷗鷺笑人真太癡錦江孤負春波暖春波春草同一碧
腸斷江南遠行客畱君不得送君行莫笑今宵酒腸窄

陪 章傑

道場山展曹州公墓歸舟賦此重以贈

行

春山如美人相對易斷腸登臨况送別惻惻增慨慷吾
鄉山水窟勝絕推道場君家有佳城鬱鬱松檜蒼作客
游江南及此春草芳再拜辭墓門涕淚紛霑裳我生亦
孤露百端集茫茫回頭見白塔半尖插崇岡招要凌絕

頂聯袂相扶將密林漏日影灑面松風涼煮茗滌煩襟
小坐開竹房暮色上人衣轉覺歸路長細徑石犖确兩
腳疲欲僵言尋太初墓小憩挂瓢堂片月懸高柳入城
已昏黃茲遊信奇快到家樂未央對酒忽三歎爲君趣
行裝畱君更何計送君殊仿徨相見訂明年同賞荷菱
香慎勿走燕薊歸期杳難量谿山佳如此故鄉勝他鄉
他鄉有何好歷碌輪蹄忙從今關河隔魂夢勞飛揚止
止勿復道多言徒神傷

重送

章傑

汝已飄蓬慣家居總暫時關山千里隔宗祀一身支楊

柳絲絲裏煙波渺渺隨離亭回首處心事幾人知

借章傑

往無錫初發口占

相思判隔路三千爲我行期展一年卻放輕舸何許去
雲腴欲試惠山泉
積雨初收未放晴谿橋新漲半篙平篷窗滿眼青山好
不許長年挂席行

先至德清訪蔡明經表兄

景光

斷岸檣輕橈一逕問修竹日斜人未歸市地樹陰綠

晚步慈相寺

暝色四山合叢薄炊煙生講院半里遙微聞吼華鯨看

山愜幽興幽磻隨人行草樹亦芬馥鼻觀難具名高躅
緬南澗懷古生遐情坡仙遺墨在試以真偽評惜無小
龍團負此山泉清明朝挂帆去吾意重怍怍

過含山

清晨泊新市日午過含山煙波湛明鏡窈窕臨嬌鬢亭
亭孤塔影中流臥微瀾登眺豈不快芒屨惜我孱先人
昔攜我春遊曾躋攀忽忽廿五年屐齒蒼苔斑山椒滄
曉閣竹樹空檀欒陳迹君勿問茲游已寡歡

過太湖

東南風起帆初飽一葉斜飛疾於鳥吳江城下棹不停

便逐漁榔落茫渺陂田菱葑千頃綠白鷺空來一點小
連山展翠作屏幃遠塔如鍼出雲表湖面轉闊風轉勁
對坐無言心悄悄五龍橋外催卸帆回首遙峯失青縹

游師子林

輟棹日亭午徑叩師子林平地出巖岫不覺意匠深老
樹倚石罅半枯無清陰籓閒養病鶴翎鍛聲亦暗凭闌
無紅袖簾影空沈沈當階開勺藥素豔愁人心古德注
楞嚴遺迹不可尋情想較多少此理自古今

拙政園

幾折紅闌舊板橋數行楊柳女兒腰飛花不解隨春去

辛苦風前作雪飄

壺觴歌板昔人非
高閣層樓帶夕暉
此日我來誰是主
山襟無復舊紅衣

泊虎邱

望望七里塘行行日
欲舛到山遊客盡
浮圖空岌嶷講臺高
欲傾盤石淨如拭
相對且箕踞坐待樹
陰黑劔池水沈沈疑
有神怪匿慘淡真孃
墓穹碑誰爲植英雄
規霸圖美人豔傾國
遺跡委蒿萊埋沒到
古德回船催買酒慰
我淚霑臆城門柝聲
急閉篷且掩息

愛山不肯捨維舟山
寺門勝遊情旣愜
夜夢清不煩凌晨攝
衣去茂林鳥未喧
虛閣俯平蕪高敞延
朝瞰天然大畫幃
暖翠手可捫有酒不
能飲孤負山容溫仄
徑尋鶴澗指點古城
垣興亡事何限終古
山無言笑彼傷心人
憑弔空斷魂

隆禪師塔

曹溪一滴燈分五
臨濟門庭盛如雨
南渡法席首徑山
氣宇如王誰敢侮
同門大德推隆公
獨作此山盍睡虎
兒孫龍象滿天下
易代公然稱鼻祖
妙喜瓣香久斷絕
此老薪傳竟千古
兩行古柏尚蔥蒨
至今遺蛻藏山塢
眞儀丹青半剝落
緇衲何人拜偃僂
素壁題名誌歲月

誰識西吳兩僮父

登龍山頭茅峰

九龍蜿蜒岡巒拱日日峯頭白雲擁陵風直上二千尺
袂衣輕快芒屨重高山當前如大敵步健端憑一鼓勇
勁風橫吹人欲墮目眩驚看翠微動野僧開關喜客至
苦薺盈甌手親捧危闌一俛詫奇絕腳底浮圖勢欲涌
江湖浩蕩落吾手渺渺煙雲接瀕洞此間合作終老計
輕別禪關心愧悚他年重到訪石門準擬茅菴結龍從

寄暢園

江南花事減芳菲春盡園林載酒稀
驀地殘香撩客恨

水邊零亂野薔薇

青山無語水無塵底樣安排寄此身
輸與園丁清福穩
朝朝臨鏡看眉顰

歸舟

孤負危橋燕語畱汀花汀草送歸舟
津亭楊柳垂垂暗
只與行人乞暮愁

德清往返口號

作客江南半月程卸裝又趁片帆輕
斜風細雨孤篷底
一路看山到德清
生涯合付水雲鄉
鳧雨鷗煙細較量百尺樓頭湖海氣

消磨多半爲紅妝

爲沈秀才

畦

題其尊甫二丈小影

道場山下前科村中有一人孤鶴鶴白須紅頰長軒軒
不肯低頭就籠樊一生力浚衣食源神仙富貴何足論
煙霞泉石匪思存瓜茄豆麥雞鶩豚屑屑料檢羞素滄
有子讀書清且敦我今訪故來叩門丈人對客顏色溫
呼酒自酌傾瓦盆半酣笑語齟齬反公等碌碌度朝昏
一旦詔下舉力田合讓老夫作狀元回頭畫幃懸粉垣
酒闌磨墨乞一言欣然下筆波濤翻詩成自哂詞太繁

寄章傑

種得芭蕉幾許長小闌干外伴新篁無邊生意眼前足
還有一階秋海棠

檢點空囊可奈何庭前桂樹日嬾娑收他一斛黃金屑
買米何須要許多

方牀六尺儘寬舒及此秋風七月初銷暑莫如支枕好
讀書已錯況鈔書

聞道吳門重作客舊游棖觸有新詩問君斟酌橋邊過
柳色何如三月時

判袂河干又隔旬夜航珍重寄牋頻幾番見說楠船到
畢竟此言真未真

詠懷十首

塊坐寂無事薄暮開柴扉瓜蔓被徑路桑柘自相圍夕陽忽西下慘淡流光微蒼莽發浩歌所嘅知者希青山曾有約避地寧可非逝將舍此去煙霞相因依桑梓豈不戀哲人貴知幾

我生未強仕胸懷百感積朝來梳短髮忽已數莖白年華去如駛卅載盡虛擲立身已蹉跎攬鏡空自惜富貴豈足論謀生尚無策憂貧不憂道諒爲名教斥姓氏傳人閒浮名定何益

周晔識方名再周解把管淋漓擊窠字元章鬼在捩弱冠愛交結得與耆宿伴說經研故訓舊聞力排纂詩文無師承下筆恣杜撰知好多嗜痴激揚半虛誕浮譽造物忌終歲憂寤寤食報理宜爾受罰敢憤懣及今早自悔庶救桑榆晚丁寧期努力補過不暇嬾吉人之詞寡仁者其言訥尼父宣此義反復著明訓生成窮薄相出語工譔斬廣坐恣談諧觸機不忍僞澆矜非長者利口聖所擯逞爾俄頃快積譽集悔吝因循不卷舌行作道中殫

夜來風雨集窗外疏竹響晨興鳥聲樂高林初日上陽精剝陰翳鴻蒙開氣象滋液猶未晞輝光到草莽羈愁

苦相守對此胸懷爽義和不停馭千載一俯仰儵忽晷
影移念念成疇曩遷謝無如何曷爲多慨慷乘時終有
日慎勿厭塵埃

德慧存疾疾燕安乃醜毒閱歷思微言至味勝梁肉薄
田兩三頃生理未嫌蹙著書長閉戶俯仰心已足未能
致顯榮庶幾免刑戮蚩蚩半生過忽忽憂患續吾道雖
艱難人事或翻覆勿以窮途苦遂效步兵哭塞翁之馬
失事後始知福

生子不可教有如耕石田縱然穠蕞勤百歲無豐年家
世服儒冠於茲十四傳式微等齊民門戶日以騫樁柱

竟無策望子心彌虔阿琮真豚犬景升端可憐世業將
墜地中夜耿不眠稚子才兩歲學語猶未全譬彼百鈞
重藉此一綫懸成立未可必違論愚與賢裕後豈無術
吾聞種德先

飽食但息偃虛負白日長靜極思散步響屨循空廊阡
陌絕無人誰歟共翺翔憶昔杜陵老巴蜀營草堂東坡
遭遷謫萬里投南荒嗟我與二公風味相頡頏鬱鬱久
居此何異幽室藏去之適樂土無若吳羌良山川各異
縣風俗非他鄉買山資幾何吾將一葦杭
矯首片雲白眇然懷故人故人如白雲可望不可親疇

昔夢恍忽如睹瓊枝新別離豈得已合并會有因借隱
老巖壑此志終當申願言矢金石毋爲徒酸辛

璞玉錮沙石中有殊采存淤泥生蓮花香潔品自尊窮
冬沍霜雪轉眼春陽溫久雨積陰暄若木升朝暎物理
每遷變人事多屈伸偶然鍛羽毛他日終飛翥放逸
自弄徒負造物恩

無錫王秀才

芝林

書來徵賦江陰黃烈婦詩在

事

丙寅四月

入夜

人傳到尺素書新詩清絕如芙蕖

江陰女兒身姓朱深

黃郎器偶綺閣虛求凰不惜雙明珠年華灼灼桃李敷
于歸正及芳春初新人故人定何如鼓琴鼓瑟兩意孚
相期鸚鵡百歲俱人生夢幻真須臾黃郎忽隨朝露徂
枝柯糾結青珊瑚一朝斷折難改圖麻衣血漬淚眼枯
獨生不若死可娛家臨一帶璜塘渠渠水清泚浴鷺鳧
志決委此千金軀腰細不勝衣五銖能以隻手綱常扶
流傳贊歎無賢愚詠歌遠播徵到吾大節皦皦不可誣
作詩永爲閨閣模

爲人題空山聽雨圖

一角茅菴何處是莽蒼千山萬山裏瀟瀟夜雨松竹喧

道人之心如止水晏坐圓蒲淨法塵朝來鍾鼓轉清新
笑他白髮僧廬下還是悲歡離合人

昔年消夏蘇祠佳湖畔荷花最多處紅幢翠蓋紛相迎
水佩風裳不知數亭亭映水自玉立冉冉凌波試微步
品格宜標君子真顏色空勞美人妒明珠亂落急雨飛
紅衣半卸輕颺度直教身世變清涼占斷人間好風露
勝遊重續不易得清福須憑天所付故人憐我工愁病
一舸攜來慰心素嫣然應笑舊時人顛顛容華已非故
臨水軒窗一帶開曖曖疏簾日將暮此別重來又幾時

倚遍闌干不能去

寄朱秀才琳

虛堂臨水濱戶牖生涼風門前有嘉蔭蟬嘒曳遠空秋
色日以絢滿階鴈來紅念彼堂中人獨立心忡忡槎牙
生肝肺鬢髮成霜蓬毋乃意氣盛受此愁病攻唯我許
同志志同遇亦同君若魚在罔我如雉羅罟不如讀農
書且作田舍翁吳羌山色好吾將老其中但慮德不修
勿悲道欲窮勉矣各努力歲月殊怱怱

卜居德清北城外柯家山麓與郎秀才薪之結

鄰賦贈五絕句

惜惜水竹自清幽
檻外青山似佛頭
清福只君修得到
不須惆悵不封侯

低頭不屑老彫蟲
自把長鑱種晚菘
寄語等閒休見客
怕人錯認是英雄

草草誅茆結比鄰
白雲應笑往來頻
入門禮數都忘卻
莫怪旁人錯主賓

閉關塵事不相妨
怪道朝來有底忙
說與世人渾不省
無邊風月要平章

倚水桃花發滿枝
臨風弱柳一絲絲
君家景色春來別
遲我明年更賦詩

瀛比似海棠西蜀產
空見慣柰緣輕
裁雲散水句誰

成乍心傾替腸縈
轉悔年時著眼未
分明紅豆拋殘人
去後詩卷裏敘平生

湖山秋色尚盈盈
旅鴻征候蛩鳴四角中
心碁局總難
平子野間歌從宛轉
緣底恨訴秦箏
且呼歡伯課經

程坐長更剪孤檠
一任落花流水各縱橫
畱待曉風殘
月路重與弔柳耆卿

點絳脣

又送別梁甫

清漏無聲一燈幽
外瀟瀟雨夜闌
聽去點滴離人語

其惜飄零怕作消魂句江南路幾聲柔櫓煙樹無重數

又

馮茂辰備書會城之時寒宵無事與戴金谿李
西齋倪米樓作茗肆之集僕命茗肆曰畱鴻
館續圖賦詩以誌其事歲暮始散去次年長
夏抵杭與西齋夜過館中試茗藉間金谿江
北寄聲之語時米樓正作姑蘇之游感愴之
餘爲賦此解又憶客冬同人集於城北天后
宮爲秋鴻館之會米樓欲於姑蘇啟春燕樓
招僕往集故詞中及之

燈火闌珊幾多春恨畱鴻館爲誰腸斷零落寒宵伴
消息傳來天際逢歸鴈飄零慣小樓春燕忘了西湖畔

和作

仁和 倪稻孫 米樓

幾日吳門何曾忘了寒宵侶那時梅雨對茗懷人苦
記否逢君却在孤山路勾畱處別無鷗鷺腸斷罇邊句

菩薩蠻

長至前二日得米樓仲秋所寄詞札南樓令
一解試茗見懷之作點絳脣二解一以和僕
一以寄曲中人香雲卽春燕主人也因賦此
寄之約與臘月十九日同祭坡公也

亭亭千尺霜林月懷人幾度成圓缺谿水碧於苔錦鱗
遲上來彩雲香不遠惆悵何曾見準擬慰相思歲寒
風雪時坡祠在歲寒巖畔

臨江仙

寄米樓書久而未發更闌無俚更賦此解以
寄兼致金谿西齋

炙硯寒窗裁尺素連朝開了還封畫圖歷歷數游蹤簾
波侵茗綠燈暈襯妝紅孤館春淡聽夜雨關心鴻影
怱怱天涯腸斷幾人同雲龍分上下風絮各西東

采桑子

暢好雲林昨夜游家書珍重促歸舟今宵翦燭西窗下
只訴湖邊一段愁

八月初到西湖作

又鼓西泠棹重經水磨頭煙波留晚霽天地正清秋葛
嶺新開路孤山舊酒樓何人憐熟客沙岸有閒鷗

觀蘇公表忠觀碑宋刻殘石

表忠觀碑八百字玉質金相極典貴文爭雲月日星光
筆挾天風海濤氣七百年來半淪沒翠墨精靈神所闕
榻來宇下撫殘石作作寒芒八雙皆平生意氣頗自詡
到此爽然空愕眙卻立凝神重諦審妙以沈雄出姿媚

知公本是謫仙人面目大與傖父異誠懸北海豈不健
劔拔弩張乏風味公之忠義如平原下筆居然神與比
我願椎拓藏家塾日日焚香頭叩地覆刻模傳出誰手
優孟衣冠殊可媿

謁于忠肅公祠拜瞻畫像

黯黹微綃挂素壁空堂白日飛霹靂豐頤廣顙貌何人
請君認取臨安伯緋袍慘淡雙袖窄少保腰牌畱字迹
森然睂宇出威稜下拜何人不動魄怪底當時畫者誰
對面能傳英武格祠墓長教過客悲粉墨猶爲鬼神惜
祇恐絹力不支久更閱百年終弃擲鄂王遺像勒精忠

公貌亦應鑱樂石英姿同作湖山鎮永與邦人驅癘疫
雄文誰記王鐵槍世上歐公定難覓

集慶寺拜宋理宗畫像

何人能繪日月容穆陵遺像勾模工真龍神采動心魄
意象不與蛟螭同冊年半壁小元祐南樓煙月歡娛空
乘雲上升一轉眼頭顱何意遭焚崇區區縑素誰護惜
劫火不到空王宮青豆房開一展拜黃袍尚有光熊熊
山南冬青已無樹野棠花對斜陽紅誰其麥飯作寒食
此閒畱得闍黎鐘香花永與修供養丁寧莫遺塵埃封
八月二十日華三丈寓館夜話邀武康徐孝廉

熊飛 飲酒看月賦此

殘月如幽人夜深始出山相見積雨後如病新起孱遲
遲吐華彩漸上庭樹端空齋話永夕短燭光未殘開門
看西湖湖水靜不瀾隔院寓徐陵酣夢松竹閒叩關呼
起起指眼窺語調何處無明月湖邊更清寒何夜無明
月良朋盍簪難急解杖頭錢買酒供清歡笑語驚沙禽
雙飛過前灘漁火耿一星橋外煙水寬勞生苦碌碌媿
此簑笠閒杯行莫厭多難得紅上顏歡悰不可竭良夜
漸亦闌酒罷惜分手風露空珊珊坡翁在天上思之杳
難攀後人亦思我茲遊永不刊

湖樓坐雨

西湖三面山面面芙蓉髻連朝雨冥濛悄如妝閣閉湖
中雨亦奇開窗快危睇愁顰亦傾城啼妝轉絕世湖山
娛心神豈必待開霽笑彼尋芳客對此空侘傺吾欲喚
漁艇一棹入煙際

舟行口占

菱角香濃豆莢肥白蕢紅蓼正芳菲何人畫幅江鄉景
著我扁舟一棹歸

蔡孝廉

登津

之母徐孺人曾割臂以療翁疾孝

廉繪圖徵詩謹系長句

疏篁滴露聲瓏玲沈沈深夜香滿庭金刀按臂快一割
片鬱可以延千齡妙手傳神畱水墨令我披圖增索息
盱衡今古豈無人到此如何媿巾幗

擬古

北風中夜急徹曉號空林朝來有所思淚下霑衣衿憐
彼蕙蘭質受茲霜雪侵采葛復采蕭兩地同此心一此解
心非明月明月有圓缺此心非金石金石可磨滅容華
有日盡明誓何時畢念昔共酸辛思之心欲折二腸如解
車轉輪口如闕銜碑四顧無知己有言將訴誰踟躕步
中庭孤鴈聲正悲晚晚歲已暮汝今將安歸三歸來空解

堂上何以慰愁思旨酒且獨酌未飲心已醉但可變顏
紅那能解眉翠悲歡信有時杜康豈足恃四旨酒不成解
飲素琴聊復彈一彈再三歎音響何淒酸念彼遠方人
零淚正萑蘭何以慰其心丹青永不刊五解

古詩五首

朔風生庭隅明月入帷幙錦衾空自爛中夜慘不樂起
坐三歎息愁思將焉託伊人天一方向以慰寂寞
相思不相見相見不相思相見如月盈相思如月虧盈
虧迭爲代安怪相見希但得同心人勿悲長別離
登山陟羊腸吁嗟何艱難叢莽獻山鬼當路多羶穢道

涂阻且長車輪爲之剋燕居會有日對此勿永歎
幽蘭生空谷孤芳雜荒穢獨秉君子性不言深自愛采
采復采采紉之以爲佩凡卉品自殊服媚不爲態
中庭桃李敷枝葉生輝光春風一以厲委弃道路旁容
色結歡娛安得百歲長南山有松柏歲宴終不傷

擬燕歌行

北風冽冽吹我衣嚴霜惻惻砭我肌空房蟋蟀鳴階墀
懷人不覺淚霑扉問君遠遊胡不歸歲云暮矣將安依
空倉之雀常苦飢欲寄尺書無鴈飛錦衾角枕夜何其
空牀獨處長歎欷辛苦爲君不敢辭願君相諒莫相疑

此身可化心不移它年相見會有時洞房清歌絲竹悲
悄悄良夜簾箔垂旨酒滿泛流離卮與君重訴長相思

里門夜發入城舟中作

寒夜無月明衆星粲以列嚴霜被野岸孤舟中夜發殘
燈燄欲冰布被冷於鐵展側不成寐柔櫓自鷗軋勞生
多苦辛方寸忽如結飛蓬在風中漂轉何時畢骨肉豈
無情奈何若秦越淒涼念山居山氣憚肌骨婉變山中
人何以禦凜冽

山容 臘月十九日同人祭蘇公祠

風緊雲繁天欲雪扁舟昨夜塘西發籃輦一徑到西湖

恰值坡仙降神日霜竹迎風舞可卷凍鄂待春香未泄
山容黯淡湖影寒對此風光客愁絕我家去此百里程
殘臘浪游寧可必乍逢嘉會事豈偶得展瓣香心所切
匆匆分手日已暮老友殷勤重惜別相期春發還復來
白傅生朝遲一月項秋子訂來年正月二十日同祭白公祠
共六千五百五十一字

柯家山館遺詩卷一終

柯家山館遺詩卷二

歸安嚴元照修能

感事述懷 以下戊辰

顛悴空牀半枕雲輕稠孤負妙香熏朝來重把菱花照
消滅紅潮又幾分

傷心鬢影日蓬鬆鏤月裁雲往事空身似經霜病秋葉
也曾禁受打頭風

涅玉焚蘭意未平十州聚鐵事分明秋風打槩江南道
錯字當年早鑄成

淒涼永巷較何如弱質判同木石居供養深閨無長物

一簾山翠半牀書

屈指風波幾度經水天閒話太零星笑他骨相生來別
久已身形似鶴形

飛絮飛花不自由蕭郎身世似黔婁曾聞私祝蓮臺下

願共清貧到白頭

連天風雪滿雕欄欲放微陽一綫難說與梅花莫惆悵
春前須耐十分寒

修竹森森翠尾長清陰深護讀書堂不知上番經春雨
幾日新梢透過牆

題何三元錫訪書圖

借書直似借我頭還書何異還荊州好書奇癖已入骨
箴砭合與倉公謀家藏萬卷意未饜蠟車障壁勞爬搜
零星只合供一炬重之不亞琳琅珍黃金入手不隔夜
一一輸向估人舟眼前寒餓何足計苟人怪笑妻孥愁
忽聞人家有清祕輕帆順逐春江流叩門相見不暇揖
請君祕笈觀其尤摩娑嗟賞五內熱紅光激灑紫雙眸
俗以羨他所吟詩試效蕭翼賺據舷欲作元章求叢殘
有曰眼紅
捆載累行李推篷細以丹鉛讎到家笑口呿不嚙歸裝
新獲珊瑚鉤誰歟妙手工績事冥模意匠窮瑯鏤明燈
披卷三歎息嗜好我亦酸鹹侔奇書瞥眼不肯捨往往

斥典千金裘神磨一角魏儀禮

魏文靖公了翁儀禮要義五十卷

柴窠

半器張春秋

張文憲公洽春秋集傳世無其書子曾購得元延祐甲寅刻本殘帙廿七卷係倦圃

藏遺經在笥鬼神護草堂夜有虹光浮醫方小說亦入

錄

宋刻史載之方二卷紙墨極精古朱佐集驗醫方十卷咸淳間刻本有高瑞南周雪客諸印記皆世所

絕無者夷堅志甲乙丙丁四集八十卷長洲文氏所藏宋刻本有玉蘭堂辛夷館諸印又有季振宜印記今皆

售於百城可以輕王侯年來風味類杜老一錢不為空

囊畱買書豈若賣書好他生未卜今生休偶然見獵一

心喜多生習氣除無由春來有約須告我與君同作江

南遊

將往山居畱別里門友人

絲絲拂面柳條柔獨上溪邊舴艋舟又與故人成小別
一聲款乃幾回頭

莫道歸期未有期故園桑柘繫人思吳蠶看到山頭白
是我輕帆欲挂時

南屏九曜峯下謁蒼水先生墓昔年曾與海寧

錢三處士馥過此今處士下世已十三年矣

張公埋骨處慘淡傷層巒如此好山色清波門外看孤
忠廿年盡淺草一坏寒淒斷峯前路斜陽笛又殘

萬峯山房贈一上人

積雨初罷山翠濃慧日峯下支短筇縈紆石徑得精舍

箕箒高下環玲瓏道人與俗殊嗜好萬斛冰雪藏胸中
偶然淩紙風雨集往往不辨魚與龍堆盤日薦花豬肉
佐以美酒蒲萄紅區區戒律縛不住了知罪福空花空
可憐俗眼小如豆皮相乃以顛名公呼以牛馬馬牛應
以顛自號欺凡庸竭來山舫識公面大聲醉語驚聵聵
坐中尚有故人子爲渠傳說新詩工此意大可砭薄俗
不以厚薄分窮通世人愛公愛詩酒我愛公有長者風
是中歲月可忘世山前揮手何怱怱秋來爲我置一榻
我欲來看秋山容

萬峯山房之旁有奇石拔起山根嵌空玲瓏特

爲詭異有刻字曰獨秀

椎鑿何年巧匠成摩挲題字尚分明江東此日非無我
獨秀如何竟讓卿

宋孝廉

咸熙

置酒湖舫酸莫其尊甫助教感賦

生西湖死西湖杭州西湖天下無西湖生西湖死茗香

先生竟如此

先生於癸亥年歿於昭慶僧舍

先生天上謫仙人衣袍曾

浣東華塵朝衫一卸不復著歸來管領江南春江南只
愛西湖好辭家高臥湖之濱生涯一杖兩芒屨蹋破南
北雙峯雲浮漚此身寄蘭若有酒日醉醇乎醇騎鯨忽
返道山去一泓湖水空鱗鱗孝廉霜露情何極歲歲湖

中酌寒食當年我亦客西湖感舊蒼茫心惻惻鮮民之
痛我更深對此能無淚沾臆
新雨初霽何三招集看經樓小飲乞書屏幃卽
湖光淡欲活山容粲以舒有如絕代人妝鏡開徐徐陟
彼湖畔樓及此新霽初同心暫相集把酒聊相於空翠
落杯葶清輝染巾祛興酣催灑翰解襟右開肱旁觀勿
咄咄筆陣新來疎閣筆復久坐柳陰轉階除人生不行
樂百歲徒云虛鍾鼎較湖山孰爲熊與魚從吾意所適
遂足傲几蘧誰能受局促長曳侯門裾

席賦

鷓鴣天

辛未正月十一日夜子時立春

裊裊花幡綴鬢新佳人頭上巧迎春梅花雪裏無消息
夜半東風與返魂 冰澗泮石泉溫隔牆小鳥報芳辰
勸儂料理閒巾笠次第青山看白雲

又

元夕雪

桂子香濃凝不飄東風吹雪過元宵街頭人靜無燈看
枕上愁多有夢撩 銀燭暗玉笙調誰家歌板夜相邀
綠窗坐對清於水墮砌仙雲一片嬌

高陽臺

三月十六日許表姪叔貞婚期是歲三月置
閨十四日清明十六日望僕於清明前歸里

畱此贈之

筆嫵遙山鑪溫沈水佳期纔過清明雲豔風香最宜天
氣新晴杏梁乳燕雙栖穩護淺寒垂下簾旌只難禁淡
卷朝來斷續簫聲 神仙富貴尋常事算何如年少錦
帳金屏春也長畱憑君細數階莫當頭況有團圓月較
昨宵還更分明恨谿邊無數垂楊催送歸程

柳梢青

宋人以此調賦桂予乃易之以賦梅云

閒倚疏寮問春何在春在梅梢藥欲飄風枝疑著雪淡
到無聊 清寒細雨連宵定愁溼雙鬟翠翹驛路三千
闌干十二芳信迢迢

秋波媚

消息羅浮夢但迷夢醒十年遲當初不合早梅花下種
了相思 而今怕到花時候心事幾人知春風詞筆儘
判孤負玉骨冰肌

采桑子

斜陽庭院無人到誰倚房龔獨笑東風照水天桃一樹

紅黃昏不覺春光靜月澹花濃濺濺溶溶仿佛妝成
曉鏡中

米樓云此數闕極爲明淨

踏莎行

雨裏衰桃風搖纖柳日長池館凭闌久珠簾不爲看花
開悵悵況是飛紅後幽夢疑雲別情如酒薄寒只怕
欺羅裏欲憑雙燕寄相思遙山一夜和春瘦

漁家傲

簾幙遮愁遮不住畫梁棲燕殷勤訴片片飛花隨水去
知幾許可憐昨夜廉纖雨芳草黏天誰是主踏青怕

卻對秋風不憶家

同嘉興丁明經

子復

萬峯山房訪一上人飯於

山舫

茅菴隱修竹盡日翠煙封笠屐忽雙到腐蔬聊一供媚
人紅葉晚畱客白雲慵歸去重城遠愁聞隔院鐘

同開化戴刑部

敦元

宿仁和王上舍

槐 厲館

吾愛戴員外出山仍在山人如黃菊淡意與白雲孱翦
燭劇談苦對牀清夢閒王郎有奇趣畱客不嫌頑

同戴刑部王上舍游靈隱

北山靈隱寺重到已經年修竹翠無盡晚楓紅可憐客

情孤鶴迴詩思片雲傳何日休塵務相於結淨緣

許兵部表見 宗彥 招同段明府 玉裁 凌教授 廷

許兵部表見 宗彥 招同段明府 玉裁 凌教授 廷

許兵部表見 宗彥 招同段明府 玉裁 凌教授 廷

涼秋集羣彥高敞比青軒樹與堂俱美人如酒亦溫深

談跋華燭雅意滿清尊名士江南北憑君屈指論

得家書 家禧 集比青軒 元錫 戴刑部 敦

清曉家書到挑燈反復看彩牋才一幅愁緒忽千端苦

愛湖山美渾忘鹽米難將雜差慰我少婦耐辛酸

靈隱紀遊四首

乾鵲噪簷角惠然來故人把手惜羈旅知我意未申扁

舟呼一葉來橫湖之濱出城見西湖已展雙眉顰兩山

雜紅黃霜葉色不純登舟復捨舟芭鞵何佻佻薄棉覺

妍暖節候報小春茲山才小別相隔未及旬譬若讀異

書反復不厭頻僧寮可託足吾意無逡巡

吾愛飛來峯樹石窮殊相嶙峋起方寸夢寐不暫忘造

物工力奇未易尺寸量咄嗟彼何人椎鑿徧青嶂名姝

受鑽灸恨事不可償山靈悔飛來千載生惆悵安穩住

天竺至今定無恙

清興殊未盡駕言上發光茂竹夾幽徑老樹參天長高

下但一碧中露榭葉黃竹筥夏寒溽泠泠雜笙簧石磴
正當塗小憩勞可忘縈紆陟小閣山仄易夕陽茶罷忽
出門欲上千仞岡諸君且勿去伸脚眠匡牀

尋山中道罷如飢食不飽同遊告痛瘡撫髀獨騰蹕攝
衣絢層崖力排羣論撓同行有杜郎芳亦愛窮幼眇置
身喬木顛聯步白雲表煙火十萬戶一望塵杳杳江湖
信大物指點眼前小快哉今自遊解我腹中疝會當選
良夜來看月出皎

送戴刑部入都

知名自垂髫三十年於今既覩君子面始知昔人心蹤

跡共萍水言論合芥鍼客遊得良友快勝千黃金萬卷
貯心胸不作書中蟬心如九秋月了無纖翳侵前生定
老衲茅菴結欵盜偶然落塵網廿載參朝簪行藏學閒
鷗隨波共浮沈泠泠太古意悄若風中琴在山忘出山
軒冕非所歆長安居不易向平累尚深辭榮非此時歲
月馳駸駸西湖佳山水知君豈滯淫去去莫回頭爲君
畱清音期君十年後芒屨重相尋

送王上舍歸太倉

渺渺婁東路吾鄉有寓公才華江入海蹤跡雪畱鴻一
卷元真子千秋蒲褐翁君著錄王述菴侍郎門下侍郎自號蒲褐翁論交非

草草惜別太慙慙孤月滄江滿寒林落葉空微茫雲浦
遠迢遞尺書通漫道千時易何人挾策工黃金催日短
白髮怕塗窮文史三冬足編摩畢世功 須努力行

矣莫憺憺

歸里展墓感事書懷

三月西泠路今朝返故鄉悲深連理樹慘絕逆毛鶴識
字憐兒穉加餐祝母康松楸對殘照展拜淚滂滂

經碧浪湖作

我愛西子湖愛其澹而靚句留翫歲月忽忽忘鄉井還
家厭岑寂懷舊心怲怲入城往五日如一彈指頃歸帆

經碧浪一權煙水永初陽麗霜林宿霧斂層嶺青山列
修眉一畱一曉妝整湖心卓孤塔窈窕隨舴艋春鉏傷淺
浦孤翹意閒靜對此歎飄蓬何時收泛梗溪山殊可憐
去之誰管領寄語蓑笠翁爲予駐清景

發里門作

又復辭家去行裝不可畱何人反招隱欲賦眸牢愁衰
草斜陽外寒林古渡頭含悽倚篷背惜別有沙鷗

風雨發山居作

一權風和雨蒼茫指武林青衫多別淚柔櫓有清音咫
尺鄉園隔艱難骨肉深篷窗頻喚酒誰識此時心

只將園子於孟冬十日歸里戴刑部期於次日北上比
一蘇州子來杭猶未成行又以詩贈之
已定成行矣勾畱復為誰重來還對酒此別又添詩紅
樹紛如醉青山澹可思十年君莫忘湖畔故人期
寒星挂空林朔風振窗紙明燈映廣筵別離從此始相
思各天涯美人隔秋水隨時崇令德後會豈云已

集秋鴻館酒後重送戴刑部

更欲畱君住君真不可畱從教歸緩緩奈此去悠悠燈
火三更盡風霜兩地愁何殊在巴峽猿叫萬山秋

又送戴刑部

良朋天上月一見一回新到眼少同調愜心真可人行
行愁雪霰望望隔關津惆悵天涯遠誰云若比鄰

寄友

別後相思剌可憐天邊霜月向人圓知君清坐三更後
憶我新詩又幾篇

與戴刑部宿秋鴻館

客裏清尊次第開銷魂賦罷重徘徊淒風寒雨秋鴻館

又遣聯牀一昔來

椽燭燒殘就枕遲中宵不覺粟生肌人間何事干卿甚

話到鐘鳴漏斷時中宵不覺粟生肌人閒事半賺甚

又數絕次目李山人堂來集

故人侵曉至剝啄夢魂驚聚散兩無定往還殊有情停
雲它日意落葉此身輕不盡今宵話踟躕又幾更

是夕仍舊宿秋鴻館

寒透重簾午夜風巖城未罷鼓三通街頭霜滑看休去
更盡離情此夕中

勸畱鬚行戲為戴刑部作戴謂云峇山勝

人生不可無眉鬚眉之生與人生俱云何鬚出獨不並
造物吝惜情非無世人誰不愛年少愛它自愛心豈殊

王喬美好同所願鬚鬚共祝遲斯須咄哉此意吾不愜
妍皮脆骨疑非夫當年我亦誇俊朗成童以往驚清臞
生年三九養萌茁偶然撫鏡生歡娛五年以長戴員外
萍逢乃在明聖湖甘心直欲稱弟子頰首自茲安小巫
何來一事欠斟酌敢以未喙參良謨崢嶸面目有遺憾
公之領下良可吁臨風空有意飛動吟詩奚解心煩紆
生意況復久如戟助公儀觀麗且都紛紛刀下不自惜
何以點綴昂藏軀知交才俊徧海內豈無直諒徒阿諛
大義不容效默默小忠敢忘陳區區先生不謗但一笑
搖頭雙眼空睚盱下階再拜再三瀆芻蕘可擇公勿迂

以規爲瑱非所望請以故訓徵漢儒昔者倉頡製而字
頰毛取象垂形模南閣祭酒書具在卓哉此義不可誣
殺雞醢酒集同輩誰其異論非吾徒有言如此不見聽
更不緘口何爲乎先生大笑子休矣我姑歸去徐爲圖
送丁明經歸嘉興
此地同棲泊君歸我未歸寒煙迷遠櫂涼月上征衣別
館壺觴罷高齋笑語非鴛湖東去水生怕鯉書稀小巫

又送戴刑部

寒水連天霜滿路掉頭欲去不肯住別館招要會文酒
回頭欲住不肯去去住何由逐兩端留送翻教成兩誤

何不遲遲待好春吾曹長與伴晨昏不然便挂片帆去
莫更臨歧說斷魂人生行樂須及早富貴神仙俱草草
故鄉如此好湖山奈何蹙躡長安道畢竟先生住亦難
相逢容易說休官梅花一樹衝寒放江上依依送去鞍

與倪三

稻孫

泥飲紀事

與倪三

狂伴相逢一放歌堂堂歲月易消磨夕陽樓上判沈醉
大好湖山肯負它

新來醮額竟何因我是深閨夢裏身拋卻西湖待歸去
奈它漚鷺苦留人
入城燈火已昏黃消受松風七盃香腸斷鱸邊人似月

才人一例太郎當
珠玉才華絕代無
可憐蹤跡溷屠沽
半生不盡蕭騷意
都入寒宵試茗圖

米樓欲畫此圖以志游跡

大校同丁明經戴刑部遊南屏

我愛佳山水復愛良友朋
兩美若熊魚得兼我未曾
北風吹西湖湖水欲作冰
湖邊畫舫閒此際與可藥水淺
枯葑滿蘭柵進未能南屏路非遠
斜日須長繩橫棹望山橋豈惜窘步仍長隄
人跡絕髡柳空崩鬢白鷺忽飛來
忘機無繳矰撫景發長歎懷古意不勝衰草埋碧血
九曜峯凌嶺再拜各無言人事風中燈羈愁何以紓蘭

若尋顛僧木榻寬
句臥竹閣看山凭
相呼買醉去鱸邊
酒如澗爛漫倒深杯
愁絕吳姬憎青山
暝欲睡皓月東隅升
道人亦多情送送緣
荒塍城闌杳何許
修路疲行滕入城
各分手滿地霜華凝
歸來掩僧寮勝游誰與矜
重煩管城子紆蚓書谿藤

雪夜與倪三試茗

風雪乍飄蕭巖城轉寂寥
茶宜深夜鬪愁傷美人消短鬢
新霜滿修門舊夢遙
祇應憑粉墨鴻爪記寒宵

寓樓曉起看積雪作

漏盡北風歇枕畔霜鐘清
高樓侵曉起羣山隔林明萬

瓦無炊煙魚鱗暗已平節序感歲晏別離悔勞生窈窕
故鄉山屋角蒼黛橫空階積縞素松竹相淙琤一枝臨
水梅春意澹未盈煙霞久託契猿鶴尋舊盟羈栖非吾
願浩然歸柴荆

寓樓書懷

齊門鼓瑟笑迂疏小別鄉園半載餘學道無方能辟穀
謀生何計且傭書窮愁天與湖山便感槩人非草木如
莫上層樓賒望眼依依霜月出林初

仲冬晦前一夕同戴大倪三試茗

魚眼初生蟹眼過松風吹醒醉顏酡鑪邊人與天邊月

一樣今宵別恨多

次夕復同試茗

分明高髻倚紅窗乍覺愁心隔座降卻話昨宵成一笑
燈花看到影幢幢
衣裳頻爲夜寒添淥酒斟來意卻嫌還是催歸還惜別
最愁人是雨廉纖

重送王上舍

風雪竟如此黯然開幕帆江天有歸雁幾日待書緘

同何三倪三湖樓小飲

雲繁風緊暮寒增隔水簾櫳漸上燈相對青山如夢裏

酒家樓上倍銷凝
西南一角晚霞微
買醉還同帶醉歸
莫向中年數哀樂
幾人清淚不霑衣

何三招同戴大李大倪三夜集夢華館有懷王

上舍

又共壺觴一度新
蕭蕭清影暫相親
婁江今夜如脣月

獨照秋鴻館寓人 丹生自號

興福寺寓樓聯句

高樓啟虛牖 元照戀戀夕陽入殿有鐘魚喧 倪稻庭無巾

屐集故人如春風 元照臘至吹將及拂面消薄寒 孫融簷

散餘溼清言意所忻 元照香林影先戢因來共懷古 孫遺

聞猶可輯梁畱延祐題 元照大殿梁有碑以在城立

有臨安在城興悠然湖上山 孫相相對如拱揖碧雲離思

盡 元照歸鳥暮情急遲我天際鴻 孫相相望到臺芒 元照時遲金

谿西齋未至

與戴大試茗

地僻堪容剗更長且鬪茶攜來天上月品到路傍花冰

雪評懷抱雲龍翫歲華宦情元澹泊重向此中賒

戴大北上之期久而未定歲聿云暮擬束裝歸

家賦此為別

日日問君行朝朝見君面君行何遲遲我意猶戀戀同
雲垂四野嚴寒集雪霰空林多朔風歸巢鳥飛倦游子
悲故鄉勞人感歲晏整駕返柴荆良會渺文讌江空煙
水靜思君清淚濺

寓館老梅作花觀之悵然

野梅在禪房枝幹瘦如此高情殿冰雪得意先桃李微
暄轉春信疏枝初放藥玉色醒倦眼冷豔照窗几依依
向黃昏客情喚愁起獨坐延素輝當函調綠綺峙嶮不
能寐睠言懷彼美

獨夜試茗作

狂蹤不避俗人猜暫遣情懷客裏開錯認文園病消渴
品茶長待夜深來
市地寒雲夜色淒傷心狂伴各東西此閒大有憐才者
苦索屏風錦字題

題寒宵試茗圖

品茶端可慰飄零僻巷深宵已慣經幾處生涯非潦倒
相看兒女總英靈春燈豔豔花能語暮雨瀟瀟曲重聽
誰識廬山真面目浪傳狂態付丹青

謁梁學士丈飯於頻羅館賦呈

一飯常選客矜嚴疑絕俗

隨園老人贈先生詩有豈繫一飯矜嚴常選客之句

重鮭菜聊用戒徵逐適逢意所欣盍嘗廢款曲昨朝啟
高齋春風風人足坐忘日亭午飢腸轉雷轂止客勿歸
遽治具餉精粢間盃羹有魚大盈脯是鹿果然一笑粲
將軍不負腹賤子備書來禪房半年宿朝朝黃壘根頓
頓鯧鱠鱠攢眉對七箸望絕筍燒肉故人偶折簡華筵
慰所欲杯槃羅几案茗芋勸醺淥窮薄真生成又復厭
繁縟平生賢主人非公更誰屬歸來思嘉肴饒涎笑相
續賦詩非報惠後約來不速

水星閣探梅

高城繚平蕪傑閣立千仞官梅閱精藍凍雪阻芳訊先

春得小雨忽覺土膏潤綠梢生意動緋素一朝豐媚人
無媚態生香更生韻娟娟倚疏簾叢竹巧相近步履行
廣庭於焉釋幽愠南湖一泓水遺事誰與問風月無古
今繁華感灰燼愛花惜花開開落愁轉瞬東風且弗吹
遲遲待春信

冒雪水星閣探梅

窈窕南湖路梅花帶雪深重來如有約臨別一相尋黯
黯添鄉思依依感客心懷人思折贈祗恐不勝簪

臘月十九日祭蘇公祠聯句

衝雪拜坡祠德清許宗彥故事歲一集開化戴敦元勝侶與會暫

元照予與金雞皆偶爾相值也

國士配饗及

宗彥別室供秦淮海栗主亦於是日致祭

虛榭寒轉深

元敦

疏梅香暗裏

元照

詩境在空林

宗彥

可見不

可拾

元敦

二十日立春與戴刑部同離會城舟中作

雪霽知春到湖邊結伴歸數峯青髻出一櫂淥波微判

袂迎殘臘輕裘去遠圻篷窗今夕話燈火暫因依

過塘栖別刑部口占

津鼓宵分急

尊前空有淚燈畔又成詩水

驛停橈日河橋聽雨時玲瓏休遣唱都是別君詞

梅花七絕句

老幹橫斜欲出牆枝頭萬玉夜生光何人鼻觀先參取

此是人閒最勝香

籬外一枝斜最好孤山千樹太繁華我家幽竹山窗下

辛苦經營欠此花

裁雲鏤月奪天工一洗人閒粉黛空只管自開還自落

了無恩怨到東風

儘有遊人次第來籬邊問訊幾枝開春風一例愛桃李

未許此曹知愛梅

獨占幽芳歲晚時生來怕受豔陽欺連天風雨漫天雪

不會開花便不奇

暗香一縷逗微微香國 臭味稀我有新詩與花配
清寒入骨不能肥 冷豔生香破早春水邊沙際自橫陳迢迢驛路三千里
多少相思寄故人

共六千三百四十四字

柯家山館遺詩卷二終

柯家山館遺詩卷三

歸安嚴元照修能

獻歲懷戴刑部 以下已巳

分手臘垂盡懷人歲乍更遙知武林權定泊姑蘇城白
日照蓬鬢青春遲客程梅花江上發相對若爲情

偶吟

獻歲一無事終朝長閉門梅花春後開叢竹雨中喧愁
以屠蘇遣詩從戲劇論卽看閒草木生意滿乾坤

元夕寓表忠觀

又挂輕帆作客來九枝蓮燄隔城開明明西子湖邊月

圓向今年第一回
春湖新水漾新蟾魚鑰重門午夜嚴城裏家家沸弦管
不知幾處卷珠簾

二十日同人祭白公祠

春風一月足梅林十分開高枝綴紅玉光照孤山隈齋
潔拜白傅輕舸湖來青山展微笑美女臨妝臺朋侶
既勝絕風日亦佳哉繁花插滿頭影落黃金壘中酒忽
不樂舉杯復停杯風雪隔年人玉山於此墮如何遠行
役思之心徘徊

湖畔逢倪三話舊

霜嚴月苦夜迢迢茶鼎淒涼舊事遙門巷可憐春草綠
故人何處泊蘭橈

嘉興道中

鶯花草草送殘春一櫂駕湖獨問津欲向菰蒲訪煙水
綠簑青笠有何人
輕帆才轉石門塘一路桑麻接水光釀得清寒風又雨
暮春天氣似重陽

登煙雨樓

欲乘煙雨賦登樓特地行裘小逗畱雙槳南湖清曉去
眼波睂黛一時秋

淒涼歲月誤儒冠涉世真如蜀道難此地煙波還空闊
誓將生計付漁竿

舟行見官道旁薔薇一枝賦之

移傍園林去應憐彩豔同連朝風又雨不改淺深紅

卽事

星河耿耿兔華流一桁風簾自上鉤羅袖涼生金約臂
雲鬢香膩玉搔頭花明秋水嬌宜笑翠澹春山淺帶愁
此際姮娥定遙妒廣寒宮殿夜悠悠

送章傑

遊子悲故鄉欲去猶遲遲居人感離別時嶠問行期行

期日以近中懷憂思蘊熏風搖征帆淚下不可忍忍淚
送行舟滄江日夜流心移芳草遠目極暮雲愁暮雲空
霏霏芳草連天暗彩燕語牙檣鴛鴦隨錦纜錦纜豈無
情送君千里程思君如逝水荏苒歲華征歲華容易闌
行人不肯還相思千里夢夜夜度江關

於高明經

銓

齋中觀梅道人墨竹長卷乃予家

舊藏本也感歎賦之

廿年不見仲圭竹肘後無方可醫俗故人齋閣多清祕
慰我牢愁啟香積明窗風日靜如水眼前一片瀟湘綠
風枝露葉筆不停鸞鳳翔空湘女哭餘瀟淋漓作草聖

不信三杯有張旭神明未失絹素完坐覺清風生卷軸
寶章入手翻悲愴未敢等閒誇眼福昔我先人嗜清賞
藏弄琳琅滿箱篋此卷標題定神品流落年年腸轉轂
滄江虹月米家船過眼雲煙周氏錄割愛君心知未甘
巧偷我計籌之熟請君料理缸面酒飲我直須傾一斛
人不對月
林端明月上一雨洗逾淨浮雲耀金波華彩自相映餘
清在房窠開簾滅短檠佳人渺何許思之發高詠

秋感

金波滌天宇舒彩流前楹空階白露下絡緯相和鳴紈

扇空團團奈此秋風生秋風何以慰零落班姬情

山居偶然作

秋瓜壓架低豆花繚牆滿金風吹未肅玉露下已緩蓬
蒿盈一階朝來梳沐嬾泉石在肘掖白雲時一款游鯤
思摩霄駕馬祇戀棧軒冕豈弗歆誰能同散誕

寄梁學士丈代柬

學士先生前際壽再拜牘長夏過武林覲面計五六羈
愁快釋冰清言妙霏玉微風生高館未覺酷吏酷評詩
雲觸石以拙詩呈覽辱以公羊傳觸石而出數語評之授餐梁佐肉恩恩理歸
檝耿耿挂心曲別來六十日涼飈裏庭竹秋高氣爽壇

興居惟曼福賤子居吳羌掩關徬巖谷嬌兒不離邨四
聲辨已熟少婦辨晨炊粗糲聊果腹園蔬須料理其事
付老僕南瓜大於瓠豆花紛上屋平生愛閒適長此願
已足借人書一編膽寫未暇讀春夏之交錄宋本東萊先生書說一部頃向許
周生借錄太常因日課三千文轉覺大忙碌日暮孤雲
革禮已成廿卷飛搔首絢高躅郵筒附便鴻寸心展所蓄有言瀆公聽
恐公頽爲蹙白礬扇雙柄高麗紙八幅殷勤求墨妙冀
以慰幽獨往還十五載樗散荷收錄下走非敬仲先生
信鮑叔有求何不可一諾應無宿寒暑已再改何日償
所欲沈吟再三息自悔所見俗依歸大君子親炙勝私

淑區區翰墨緣屢瀆則不告叩頭謝皇恐竚切德音復

晚步

意行無所指緩步隨流泉新月出東嶺娟娟未解圓隔
岸山漸暝布帆破蒼煙行行一回首此景難言詮

晚霽偶成

秋雨集疏竹妙音一時奏破竈出炊煙散瓦溼不透蓬
門掩蘿薜枯坐榻清晝浮雲破林樾日色忽斜漏西山
滿牆頭窈窕數峯瘦微風吹桂樹冉冉香滿袖磐石可
晏坐濯足寒澗溜夜來松際月殷勤自相就

題杜芳聽泉小影

畫虎須畫骨相士莫相皮肉眼空睽睽誰能辨妍媸杜
郎眉宇閒妙無俗可醫徑當從赤松餐霞以忘飢或者
傷朱門功名可乘時泉聲有何好傾聽毋乃癡豈若絲
與竹入耳開心脾嗟彼世上人碌碌空爾爲流泉自幽
咽千載無鍾期唯爾愛清音此意無人知吾耳已淨洗
他日行相隨

重陽前風雨

攪林風雨急時序逼重陽白髮添新感黃花憶故鄉親
交書問絕日月米鹽忙差喜西成近家家足稻梁

於章傑

家別倪二

印元

時正得

章傑

書

一別忽五月相見歡有餘空齋風雨集落葉盈階除天
未有故人遺我尺素書開函見顏色幽懷一以舒何爲
長太息太息復峙嶠相憐皆老大日月去不居借問遠
遊子何日歸田廬我來未暖席我行已脂車君請勿太
息太息徒愁予

秋懷四首

別君一匝月思君九迴腸清風西北來白露吹爲霜階
下何粲粲秋花日以黃感茲節序改令我懷抱傷羨彼
雲中鳥雙飛共翱翔幽懷將語誰涕下空霑裳
去去復去去戒途屢回顧淒淒復淒淒明月照廣路年

華逝不畱別離經幾度紅顏耀朝權豈能長如故願爲
比翼鳥雙栖中庭樹
枯樹生道左上有雙慈鳥小鳥何啁啾翻飛相含哺風
來巢欲覆弋者復張弧嗟嗟毛羽鍛何以將我雛叢蔚
可遠害安用懷故都卵翼待其成庶幾報勤劬勤劬日
正長慎保千金軀
孤竹生崇岡裊裊枝葉稀唐蒙延蔓起嗟彼生理微榛
莽多虺蝮霜雪交橫飛孤竹不自保唐蒙將安依天意
苟如此何用長歔歔

慈相寺看雪

何人夜半引竹弓粉點彈滿青芙蓉朝來乾鵲瘖不噪
更無寒日生瞳矐牆頭數峰看不足尋聲欲訪閣黎鐘
晨餐未飽入山去舉趾不似平時慵空林恣率自作響
殿閣高下誰覺重山迴路轉見蕭寺巾笠不與僧雛逢
短橋流水迷近遠詩情畫意爭淡濃落葉已盡失丹榭
寒柯未改知蒼松眼前好景取不盡綠尊紅袖輸孤筇
吳羌山隔一城水山椒尚有愁雲封欲登竹閣一放眼
來朝蠟屐誰能從

慈相看雪霽

晴雪明遠峰空林散初旭野橋無行人平岡快遙矚幽

人殊未偶寒泉咽遺續
臘月望夕霜月佳甚夢戴刑部

別君三百六十日一日思君一百回
多少故人明月夜
何人夜半夢中來
山嶽尚存愁霧挂
清絕敲篷雪離懷
一夜新深聞燈暝
後愁殺夢回人
翻覺傷心極
今宵覲面新崢嶸
燈下影慘淡
夢中身苦茗
供人醉寒花
笑客頻春江
經歲別風雪
滿關津

春風何不來
芳信阻寒梅
一瓣香誰託
千年鶴未回
樂天鄰比近
淮海歲時陪
惆悵尋紅藥
偏遲十日開

李大堂倪三稻孫汪三家禧湖畔送行歸舟賦

湖山不放行
人行故人送
我歸帆輕
畱人送人
一回首
欲歸不歸空
復情紺霞乍滅
日向晦風颭
微燈光半碎
嚴寒水宿欲
折絲一夜繁霜
壓篷背荒雞啼
罷星漸少
轅門角聲警
栖鳥湖山望斷
沉故人寂寞推
篷向清曉

憶章傑

惜別津亭上
畫船滿溪雨
暗綠楊煙馬蹄
北去隨秋迴
鴈陣南翔入
夢懸臘酒味醲
殘歲盡梅花香
冷早春前

五旬風雪鄉書絕聞道河冰近更堅
吳羌山雪看曾飽孤艇歸來雪又飛
屋角山頭連夜白水邊梅信隔年稀
天寒小市魚鰕貴日莫空江鳥雀饑
一縷炊煙蘆荻暝釣船生計未全非
一天暮雪壓簷端獨對清尊遣悶難
隔院老梅春似夢空庭凍雀靜無歡
愁人擁髻嫌宵永穉子蒙頭怯早寒
風味山居差不惡巢林容易借枝安

野望

野望意騷屑敝裘支朔風寒波平極浦飛鳥沒長空茅
舍門多閉危橋路半通春牛隨臘雪應驗隔年豐
梁學士文於丁卯之秋重宴鹿鳴
溫旨晉秩有紀
恩書懷之作手書見貺未及奉和歲暮索居謹次元韻

鄭重絲綸下九閭

先皇侍從拜龍光書名趙董推前後經術盧

餘姚錢學士

嘉定論輩行春草夢回餘一个

元唱可惜弟兄雙折桂北枝今日不同芳謂令

弟少司秋風戰罷又三場定知梅菊非凡品玉蘂金英

晚更芳

辛勤視削徇吾徒手未支離眼未糊

手未支離眼未昏先生謝客詩句

舉校詹看齊德燿

汪恭人長先生一年

著書心早付官奴

少司空長君諫

菴文學為先生後諫菴所著有史記志疑等書

斗山聲望

朝端重縑素光芒

海外徂聞道籃舉湖畔過有人錯認是潛夫

浙西盛事記丁年

且雨露公家特地偏

曠典再遺千叟外

乾隆乙巳嘉慶丙辰千叟宴先生均以在籍未及與

殊恩獨占十人先

吾鄉重宴鹿鳴在先生前者始

雅歌此

日勾模徧桂籍他時掌故傳佞佛從來嗤白傅心香端

奉

卷三

至尊度

優禮居然漢五更

天家車服重桓榮武公耄學賓筵

戒平子思元性行旌上苑羣仙皆後輩空山老衲定前

生 焚虛中公曾為先生作僧 哀行看子題日過去僧像

江南多少詞人在 朝瑞

無忘詠 太平

除夕感懷

忽忽三冬盡迢迢一歲過椒花消夜永柏葉釀愁多舊

事增於邑中年涉坎軻無才承父祖有命託風波骨肉

弦離柱光陰錦擲梭誰憐鸞翮鍛祇恐虎牙磨隻影悲

孤露他年避網羅身從慈母乞罪任世人訶厄運龍蛇

免沈痾犬馬瘥新來歡會短聊共醉顏酡爆竹連宵鬧
春風次日和深閨應寄語破涕正高歌
爆竹千村響燈花一夜新檐留隔年雪人醉歲朝春詩
筆拈來健香醪分外醇故鄉雖寂寞猶戀舊比鄰

敝裘

鄴在毛安在襟殘領亦殘恥同狐貉竝曾比蕭霜看
經秋曝那堪禦曉寒披裘思往事灑淚豈無端

新被

一枕思鄉夢何由到黑甜美非同錦爛溫不怯霜嚴記

取宵寒劇親勞玉指纖囊中木棉在珍重爲君添

倪三過訪山居再信而歸賦此送別

春風吹行雲到我溪上來溪上有草堂暗香闕寒梅春
情鬱以紆春思空徘徊顏色久枯槁一笑爲爾開看水
復看山到眼皆新裁放浪亦何爲歌歎良可哀聽雨夜
話舊悵悵中心摧雲行無滯跡歸傷山之隈誰向空山
中高築黃金臺勸爾渡江去期爾春暮回珍重好鬚眉
勿汙世上埃

贈倪大

鑑澄

兒寬帶經何不鉏卻來賣酒北郭居誰可與言合抱樹

聊以自娛盈架書門前一道寒澗落屋角四圍青嶂疏
相從把臂得奇快時有高論來起予

六月十三日先人捐館之辰書以志痛

生年卅有八喪父已十年嗟哉十年中所遇多屯遭蝗
虺在牀第胸掖搯戈鋌無梯弄碧落無穴逃重淵不惜
門戶毀所貴身命全訶詢豈云免薄俗工瑀鑄避地傍
巖壑沈痾暫時蠲今年積梅雨溽暑六月天中旬第三
日先人館舍捐三千六百日音容隔黃泉黃泉已滅識
冥漠長安眠靈兮如有知能無泣血漣哀哀呼阿翁再
拜陳几筵彊食彊進酒母爲世故牽興衰若循環成敗

非偶然此身儻未死誓將守青氈閉戶理舊業伊吾課
阿遷嬌癡四歲半能誦爾雅篇阿遠生兩月張口欲食
拳所冀此兩子長大有賢祖武庶可繩書香庶可傳
顛趾利出否率履慎勿愆勉勉復循循中道敢息肩沈
吟日將暮皓月東林圓攄情兼述哀詩成足可憐

詠秋

微風吹桂枝枝葉自歲蕤白日麗晴昊清光颺玉池美
人理紈扇惆悵薄涼時

中庭雲月鮮白露皓已團洞房清且幽華燈照形單鳴
琴雖在御撫之不忍彈

明月朗西壁蟋蟀鳴東箱獨居不能寐羅帷從風颺節
序有代謝憂懷何日忘

秋日山居早起作

叢桂墮涼露修竹臨清風池面生微瀾倒射朝陽紅山
居獨愁病晨興萬慮空翳然見林木便與濠濮同撫茲
佳光景聊欲息微躬苟安避羅網麋鹿知深衷
小園風露清秋氣日蕭屑蕎麥花徧開彌望白於雪豆
莢實可烘瓜蔓架欲撤靜觀草木改閒將歲華閱餘生
經憂患漸於物理澈俛仰隨寓安吾願守吾拙

武康二都風山有靈德王廟蓋古防風氏也廟

有吳越寶正六年碑記向來金石家無著錄者

近徐孝廉

熊飛

始椎拓示人嘉定錢少詹爲之

跋曰史記汪罔氏守封禺之山裴駟引韋昭曰

一合封封山禺禺山在吳郡永安縣又云駟案晉太

康元年改永安爲武康縣今屬吳興郡今風山

在縣東二十里廟在山下封風同音殆卽韋君

然亦日所謂封山也予遷居德清去二都十里而遙規

往未果每歲八月廿五日爲土人報賽之期今

茲始偕友往遊廟在山麓入廟見山如張屏障

碑在廟門之東壁寶正二字已摩滅蓋錢氏納

土後自行鑿去文中又鑿去數人姓名餘皆完好
好行狎書茂美可愛予喜得償夙願因賦詩以

誌之果武越人氏廿五日然土人辭賽之聯合

秋光日蕭爽秋水轉清泚劃波喚細槳水程十五里推
篷見風山秀色落窗几奕奕靈德玉脾蠻四千祀像設
何隆崇與山同不圯穹碑猶未泐吳越文可紀惜哉六
一翁集古竟遺此平生有微尚愛古無遠邇茲來快眼
福不獨山翠美徘徊日將夕歸舟一帆駛誰能啟山樓
容予貯行李

擬古

茗茗海上月遲遲上東牆高樓一何峻相對遙相望流
光入綺疏鳴琴發清商羅衣薄可鑑中宵有微霜寒蛩
何所苦唧唧聲不揚唧唧復唧唧美人心獨傷

送沈四榕之濟南

回飈振羣木萬葉辭高空送君遠行邁悠悠岱之東琴
尊豈無感尺素猶可通春草明年綠陌上望青驄
結茅北郭外煙霞伴朝昏寥落風雨夕唯君長叩門相
見可忘憂對君勝樹萱小別儻經歲此懷何可言

里門感事四首

秦人視越人肥瘠何關情關弓而談笑射者非其兄嗟

予更坎坷危屢獨力撐骨肉以膜視鴻毛無重輕消膏
火日迫吾亦厭吾生

治絲絲益亂止沸沸愈揚空以百歲憂攬此九折腸悵
日如車轂割愁無劔鋸悠悠行路人相見驚老蒼撫鏡
不敢照相對徒心傷
有苦不能言瘖人茹黃蘗有術無可施神符被鬼竊手
握太阿鋒會見十指折置身鑪火上倉皇避無穴十年
數遭際欲調語先咽被髮入空山悔不早自決

誰謂河水廣杭之一葦足誰謂冬夜長羊胛煮未熟先
號後或笑劍極庶幾復蒼蒼豈無因使汝羅慘酷種德

非所能補過理宜速能知伯玉非莫就詹尹卜

吳得嘉興馮秀才通書

鴛湖有故人兩載不相親錦鯉隨波上瑤華入手春寒

山秋見骨遠水澹無垠此際柴茨下離愁一番新

蠡山看紅葉題范少伯廟壁

清霜著地無顏色染向秋林深淺紅半壁寒潭收返照
一山修竹亞西風隨身笠屐幽尋愜俗語丹青舊事空
欲起鴟夷問遺恨五湖煙水正冥濛

經烏山許恭簡公故第所謂德清山館也

德清山下尚書莊蠟屐經過草樹荒大厦只今畱廢礎

清風依舊滿寒塘免葵燕麥春無迹虎氣龍身夜作芒

孫真山詩集卷五真意重問敬和堂恭簡有敬和堂文集

金錢散漫綴籬根野菊紛然發滿園五夜清霜支傲骨

一庭涼月罨冰魂秋容試較美人瘦真意欲忘高士言

愁絕華筵燒絳蠟丁零絲竹後堂喧

蘇軾郡城歸櫂畱別沈二哇倪二印元周大中孚奚

大疑張三文裳高大錫蕃

避地吳荒歲月賒相逢草草漫驚嗟無多舊雨秋如許

幾度西風鬢欲華香火因緣歌伎木雲龍蹤跡惜搏沙

寒宵霜滿城南路餐飯丁寧努力加

惆悵詞并引

為徐秀才球作也秀才喪其妻袁夫人淑英屬子

賦之其詞曰

三五明月盈畫堂相對雙影清四五明月闕終古人閒

照離別明月乍闕盈有期生離不若死別悲禮華嫩藥

一朝謝聽我長歌惆悵詞惆悵新詞為誰作筆牀硯匣

增蕭索城北徐公正少年永逝文成淚雙落當年消息

阻銀河咫尺靈槎水不波乳燕銜泥雙宿穩夫渠出水

竝頭多鴻妻萊婦真佳偶春蕙秋蘭得良友誦詩早廢

蓼莪篇入廚小試羹湯手層樓一角俛清溪隔岸青山
眉黛低長倚明燈催夜讀翦刀聲斷聽鳴雞傳來韻事
閨中足不那天公妒清福繡葆新添掌上珠雲鬢早折
釵頭玉電掣風馳只五年香銷夢斷隔重泉珮環一去
隨黃鶴風雨三春泣杜鵑只見風吹花墮蒂不見東流
水西逝富貴神仙盡可求瓊枝再見終無計願託丹青
與返魂披圖長儼伴真真多情定屬真名士短命知非
薄福人花似非花霧非霧江南徵徧瑤華句鸞膠便遣
續離絃自是新人已非故手把黃花勸一觴願君百歲
壽而康神傷慎勿同荀令祇恐泉臺欲斷腸

得金谿陳明府

珪

常山書卻寄

清淺臨溪水天寒上鯉魚瓊瑤隨驛使消息到山居贈
策三秋暮傳牋一月餘影憐黃菊淡香惜早梅疏竹徑
泉流咽松門月上初思君無限意珍重數行書

送郎二秀才

森

撲面霜風急河梁獨問津滄波隨權遠孤月向人親回
首庭闈老關心燕鴈頻畱君竟無計此意媿比鄰

寒夜與許秀才

元崇

袁秀才

洽熙

集戴學博

作

霖

齋中小飲復同出北城看月作

人生快意君試數富貴神仙一坏土不如日日飲美酒

破悶全勝萬鈞弩酒杯在手月在天眼前風景真可憐
寒宵對月自斟酌不須更照花枝妍坐中難得同心客
草草盃盤陶永夕此時不飲對空尊百歲光陰盡虛擲
金丸淨浴銀波冷倒瀉清光千萬頃酒酣呼月入盃中
舞亂空庭苕藻影月明愁向城中看卻出山城夜將半
千林葉盡貯空明屋角寒山數峯斷對此真愁清漏移
歸去休歌白石爛野霧冥濛山月低城頭柝靜風淒淒
喚起常娥展精彩爲我送客溪東西香對早梅疏竹
長至後許秀才 元崇 招集草堂卽席分牌聯句
嚴寒正凌兢 徐養 微陽始萌茁 元照 刺繡綫欲添 戴 驗晷

景猶疾 養原 草堂具尊酒 丙 春風生丈室 元崇 四筵靜無譁
丙 清談霏玉屑 袁洽 微醺卻重襦 徐球 遠情寄遙瑟 元照 裙
屐憶昔年 洽熙 萃蒿欣此日 養原 盤滄媿粗糲 元崇 心素慰飢
渴 元照 感茲歲華晏 洽熙 坐覺風景別 元崇 一枝旋吐香 元照 千
山遲飛雪 球 纖雲斂高穹 養原 澹日下林末 洽熙 歡悰旣云
愜 元照 吟興殊未歇 洽熙 遲遲銅鉢催 丙 凜凜金谷罰 元崇 狂
劇驚兒童 丙 勝槩雜仙佛 球 風流六人共 元崇 絢彼竹溪
逸 球 徵逐非所宜 養原 盍簪良可悅 球 聯吟誌清集 養原 媿
乏江令筆 球

臘月三日始雪

羣雀噪叢薄同雲四野暮北風大作寒巧抵紙窗隙黯
黯天欲暮幽篁淅淅瀝微雪下空林繽紛入簾帟散空
花自旋墮地素未積瓦溝閉炊煙牆根澆蘚石清愁盈
懷抱對此一時釋隆冬苦乾旱萬彙損滋液真宰卹物
情乘時下膏澤來年預可卜豐穰無疾疫但願沈疴除
更得飽飯喫黃金雖可貴此樂殊不易殷勤告婦孺煦
嫗慰蕭寂火鑪煖衾稠油燈罷刀尺四體縮如蝟積然
委牀簟夢回五更盡起看遠峯白

寒夜有懷倪三卽寄題高山流水圖後

山高高高入雲山下鶴鳴聲不聞水深深流不極蛟龍

夜舞滄溟黑天生奇材定何用秋月春花恣嘲弄無端
下筆驅風霆有分終年受飢凍賣文不見一錢直嗜酒
誰將千斛送天涯落魄東復西枳棘如何宿鸞鳳寒宵
欲呼夢隱子汝今飄蓬徒爲爾江路風雪梅花開浩歌
何不歸去來窮途不恨人情薄只恨鑪頭風味惡隨身
酒債多於詩歸來依舊垂空橐嗟我與爾當少年立名
應在他人先悔不熟讀兔園冊置身直上青雲顛苦吟
禿盡生花筆潦倒空遭俗眼白故人相見問頭銜喚作
江南老詞客可憐詞賦動江關轉覺年來行路難鏡裏
十年添白髮尊前一笑談朱顏結交空復滿天下名士

何人辨真假，妻孥愁絕。塵滿甌陌路，誰憐繭生。蹀思君終日，心悵勞松下綠綺。生秋濤，知音我亦恨，寥落草堂遲爾開蓬蒿。
孤山山下幾經過，歲歲衝寒拜老坡。把手故人憐契闊，關心梅信怕蹉跎。水仙祠古靈風靜，處士墳荒夕照多。臨去湖邊重回首，雙峰相對斂修蛾。

呈梁學士丈

鸞飄鳳泊酸齋字

先生齋中以丁微君龍泓所模貫酸齋書山舟二字爲額不見經

年態倍新案上博山爐，欲活階前書帶草。初勻倚牆閒

殺竹尊者入坐欣逢石丈人，至竟公家春信早。寒梅檻

外已精神

雪窗與倪大

鑑澄夜話

話到深宵雪滿庭，油燈照影耿疏櫺。殘年共惜駒過隙，涉世真憐鶴翦翎。擬慰窮愁呼白墮，未消幽憤看青萍。講元寂寞揚雲宅，蠟屐來朝肯重經。

雪後遊慈相寺

雪霽尋招提，亭午歇鐘磬。陂陀羃縞素，山容轉明淨。高松無喧濤，平岡朔風定。看山此獨坐，心意兩無競。何事感子懷樵歌，出山徑。

雪復作

凍雪欲等伴見睨不肯消雲繁日色薄風勁寒氣驕紛
紛下霄雪碎玉空庭飄折竹聞遠響幽泉咽清瑤伏水
魚尾定繞林鳥腹朽濁醪盡一尊未覺朱顏凋撫景感
予心終歲空囂囂念彼繁華子被服狐與貂圍爐煮美
酒坐擁雙翠翹亦有可憐人寒餓暮復朝四體戰欲踣
不得飲一瓢物類理不齊佚樂難幸邀君子貴素位安
用多蕭悽

雨窗言懷

黯黯暮窗下瀟瀟寒雨零峯巒微賸白松桂漸呈青理

解杜醪妙德慚劉室馨蜀莊非不偶素志樂沈冥

歸舟

殘年歸思切孤艇夜隨風梅信故園早客愁煙水空微
茫千嶂白揜菼一燈紅去住皆非計眞憐類轉篷

夜雨

乍別異縣山來聽故園雨空階聲斷續愁人耿無語夜
深恐作雪歲華已如許

又雪

飢鳥寒不那羣噪集簷牙日暮風如箭更深雨作花苦
吟詩料少獨酌酒材奢生意眼前得小窗青玉芽

除夕

陽烏融積素轉眼歲華徂竹影當窗瘦梅香入座腴懸
冰鳴脆玉凝溜綴明珠笏熟雲浮甕炊成雪滿盃暫時
忘侘傺過此冀昭蘇髮漸看添白顏難更駐朱處堂悲
燕雀依樣笑葫蘆婦淑嗟何及兒癡事可虞不眠非守
歲懷抱獨區區

共七千一百六十七字

柯家山館遺詩卷三終

